






*De la guerre contre les huguenots
1622* 56 97



no. 1

PETIT ADVIS.



A FRANCE est partie en deux, Catholiques & Huguenots, tous deux en paix esgalement obeyssans au Roy: mais aujourdhuy non esgalement obeyssans souspretexte de la guerre & à cause d'icelle.

La guerre est commencee contre les huguenots. La proposition ou de la cōtinuation d'icelle ou de la paix avec eux, partit les esprits & des vns & des autres pour estre vne des deux ou creuë bonne, ou desiree.

13

Du costé des Catholiques ceux qui croient bonne la proposition de la guerre, & en soustiennent l'affirmatiue, sont les innocens Ecclesiastiques, tous les zelez Catholiques, les Religieux qui ne sentent point les incommoditez de la guerre, & quelques bons Politiques qui croient par raison d'estat que ceste guerre se doit faire iustement, & se peut faire vtilement.

Ceux qui ne l'approuuent pas en leur cœur, neantmoins la desirēt & y poussent, sont nos voisins enuieux & desirans no-

Case 15 39 326 1622 du 2
estre ruine, & leurs partisans, ceux qui ont & esperent auoir les grandes charges, l'autorité & pouuoir dans les prouinces, dās les villes, ou dans les armées, les Gouvernemens des places, & autres conditions qui haulseront leur rang: plus tous les pillards, les sacripants, picoreurs, soldats de terre ou de mer, & toutes autres personnes qui viuent de rapine.

Tous ceux-là se fortifient de l'aage, de la pieté, & de l'humeur altiere & genereuse du Roy, qui est la premiere & plus forte piece de ce desseing. Ceux qui ne l'approuuent & ne la desirent pas, sont tous les sages & bons François, qui bien que ceste guerre puisse estre iugée bonne en foy, n'est pas neantmoins iugée bōne par eux, prinse à contre temps, comme ils la croiēt, & est ceste croiance esgalle aux sages & non interessez, & à tous ceux qui viuent d'ordre & de reigle de tous les deux costez. Ceux-là se fortifient de leur part de la sincere bonté & de la prudence du Roy, & de la creance & foy qu'ils estiment qu'il donnera aux bons conseils, par le poids desquelles secondes vertus qui sont esgallement cogneuës en luy, ils esperent que la balance de ses entreprises qui par la force des premieres lors seules mesurées, auoit

esté violemment emportée, seramenera au moins iusques à son esgalle & iuste assiette pour endeterminer par luy à son honneur & aduantage & bien de son Estat.

Ceux qui desirent & promeuuent la guerre, maintiennent qu'elle est Honorable.

Vtile non seulement en sa fin, mais aussi en son entreprise presente.

Iuste.

Necessaire.

Ceux qui desirēt la paix, & la voudroiet bien promouuoir, disent que toutes ces qualitez se doiuent & peuuent donner plus certainement & plus essentiellement à la paix.

Les raisons alleguees pour la guerre, sont qu'elle est honorable, 1. Parce qu'il s'agit de l'honneur de Dieu, de la deffence de l'Eglise, de laquelle le Roy comme Roy Tres-Chrestien, est le fils aîné, protecteur de ses droicts par succession, dignité, & serment.

2. L'exemple des bons Roys ses predecesseurs, qui ont heureusement & glorieusement estouffé dans leur Estat l'heresie des Albigeois, & autres naissantes.

3. Honorable à vn ieune Prince qui n'a aucune guerre avec ses voisins, n'en peut

auoir contre les infidelles , desquels il est si esloigné , que pour n'auoir ny le tēps ny les lieux propres pour leur faire la guerre, il s'en dispense aussi avec honneur, pour le moins sans blasme.

4. Qu'il doit commencer d'estendre le vol de sa renommee par l'extirpation d'une secte qui s'esleue non seulement contre Dieu, mais aussi contre l'autorité Royale.

5. Honorable encores à ceste heure , & par exemple d'un costé, & quasi par nécessité de l'autre , parce que depuis deux ans il a eu & de l'aduantage en ses desseins & du desaduantage, & tous les deux l'obligent esgallement d'honneur à recommencer la guerre. L'aduantage qu'il a eu par l'esperance du pareil, le desaduantage par le desseing du chastiment & de la vengeance.

6. Honorable en ce qu'il ne peut quasi s'en empescher sans blasme, ou de peu de pieté, ou de peu de ressentiment de l'offense, ou de peu de forces & de puissance pour s'en pouuoir venger , chacune desquelles reproches seroit capable de toucher son ieune & magnanime cœur d'une si visue attainte, qu'elle luy deuroit faire entreprendre d'aller manger les murs de

Constantinople avec les dents.

7. Honorable pour vn fils aîné du Grād Henry IV. qui par malheur nay, nourry, & esleué dans l'heresie, eut neantmoins la grace de Dieu, de r'affermir sur sa teste avec sa valleur & avec son espee la couronne de tout son Royaume, que la perfidie de la pluspart des François ou esblouis, ou abusans du pretexte de la Religion Catholique, luy vouloit arracher. A plus forteraison son fils aîné sorty de S. Louys, nay & nourry dans la Religion Catholique, aujourd'huy semble obligé de reconquerir vne petite partie de son Royaume, qui sous pretexte d'une Religion faulce, & condamnée, luy desnie la iuste obeïssance qu'elle luy doit.

Vtile.

1. Premièrement en sa fin, en ce que si le Roy peut oster ce chancre qui a prins racine dans son Estat, il se descharge d'infinites despences qu'il faut qu'il soustienne par eux, ou pour eux.

2. Qu'alors n'y ayant plus nulle teste de party formé, ny par consequent nul pretexte à personne de se pouuoir rebeller, chacun obeïra par tout à ses loix & à ses commandemens.

3. Qu'il pourra d'oresnauant avec peti-

re despence gouverner les grandes affaires de son Royaume, retranchant toutes excessiues qui ont pour pretexte qu'il faut estre tousiours preparé en cas qu'il arriuaist quelque souleuement qui ne peut arriuer que par eux.

4. Qu'on ne craindra plus que les estrangers qui ont eu par eux quelquefois entree en ce Royaume, y puissent sous leur pretexte y mettre le pied à l'aduenir.

5. Vtile en son dessein & en son entreprise presente, parce qu'estās aujour d'huy les Huguenots dissipez & mal vnis, n'aians point de chef general, & n'en pouuans auoir vn assez puissant, il semble impossible qu'ils puissent resister au party Catholique beaucoup plus grand & plus fort, commandé par vn chef vigoureux, present en personne, assisté d'hommes, d'armes, de moyens, d'equipage, de suite digne de luy, & proportionnée à sa grandeur, qui a eu d'heureux augures & commencemens de ses victoires les années passées! ha la faueur de Dieu visible & apparéte, les vœux du royaume, l'amour de tous, & l'obeyssance prompte de ceux qu'il y voudra employer.

6. Que les deux plus signalés & estimés chefs qu'ils ayent, sont iusques icy demeu-

rez fidelles, l'un seruant actuellement le Roy contre eux mesmes, l'autre viuant dans sa maison avec demonstration qu'il ne veut en façon quelconque tremper dans la desobeyssance du party. D'ailleurs tous deux d'aage, & de santé, qu'il semble qu'en tout cas ils ne peuuent faire gueres de mal: leurs autres chefs ou encores peu experimentez, ou avec si peu de creance generale, qu'il ne faut pas craindre qu'ils puissent resusciter les cendres d'un Admiral de Colligny.

Iuste.

1. Premièrement en ce qu'elle est honorable & vtile, car toutes choses qui ont ces deux qualitez ensemble, ne peuuent estre que tres-iustes.

2. En ce que contre toute raison les Huguenots veulent estre deschargez en beaucoup de choses de l'obeyssance entiere & absoluë, à laquelle comme subiects ils sont tenus, & que les subiects Catholiques rendent; & auoir des priuileges particuliers que les Catholiques n'ont pas: ce qui est iniustice à souffrir, iustice à oster & arracher.

3. Car encores que le Roy comme Roy puisse donner des priuileges & libertez à quelques vns, & les denier aux autres; si est

ce qu'il ne le peut faire sans quelque iniustice, s'il n'y a raison apparente de le faire. Or quelleraison y a-il que le Roy paye aux huguenots comme huguenots leurs garnisons, Ministres & Colleges, leur fournisse des lieux, de temples, & de cymetieres, leur permette des Assemblies, des Cercles, des Deputez, & finalement leur donne des villes, & qu'il n'octroye nulle de ces choses aux Catholiques comme Catholiques.

4. Pour les villes de seureté ou de mariage, lesquelles n'ayans esté donnees qu'à temps, il est raisonnable qu'elles soient remises entre les mains du Roy, neantmoins sont par eux retenues de force & d'autorité.

5. Qu'il est iuste qu'ils dependent de la foy & parolle du Roy, non le Roy de la leur: car bien qu'ils pretextent la seureté de leurs vies, premièrement leur vie ne leur peut estre plus chere, & ne doit estre par eux tenue plus chere qu'est au Roy sa parolle & son autorité. Secondement leur seureté sera plus grande quand le Roy sera caution de leur seureté, que s'ils le sont eux-mesmes, puis qu'il n'y a rien en France de seur à qui n'est pas sous la protection du Roy.

Necessaire.

1. Des trois preuues qu'elle est honorable, vtile, & iuste, resulte la quatriesme, qu'elle est necessaire: Car c'est vne espece de necessité de suiure par dessein formé ce qu'on cognoist apparemment honorable, vtile, & iuste.

2. Necessaire, parce que si à ceste heure qu'on a apparent aduantage sur eux, on n'essaye de leur oster tout moyen de pouuoir iamais se rebeller, ils se tireront à la longue de l'obeissance dans laquelle on ne les pourra plus remettre.

3. Et selon les occasions entreprendrôt de nous venir eux-mesmes attaquer & chercher à nous accabler.

A TOUTES ces raisons se peut respondre.

Aux raisons de l'honorable.

A la premiere qui regarde l'honneur de Dieu & la defense de l'Eglise, se respond que ceste raison est vraye en foy, mais parce que l'honneur du gouuernement des Estats & de la guerre ne se prend pas seulement de la cause, mais aussi de l'issue, voire mesme que le plus souuent la renommee de l'issue engloutit celle du conseil, & du dessein, lequel est quasi tousiours ou loué, ou blasme par l'issue, en si grandes actions, il faut priser & l'issue au-

tant qu'on la peut preuoir par les moyens qu'on y employe, & les moyens aussi pour y paruenir, & sur le tout bien examiné former le dessein. La guerre des Chrestiens qui sont dans Constantinople ou dans Ierusalem, pour oster la domination de la ville aux infideles, seroit honorable en son dessein : Mais parce qu'elle est iugée impossible, elle n'est pas tentée d'eux, parce que le dessein ne pourroit auoir certitude d'une honorable issue.

A la seconde qui se prend de l'exemple des bons Roys du passé, se respond que les Roys qui ont de leur temps exterminé les heresies qui se trouuoÿt dans leur Estat, en ont pris le dessein, lors qu'ils ont veu que cela se pouuoit aysément faire, sans grande perte ny despence ; & de fait on voit par les histoires que ce fut plustost simple punition & chastiment, que guerre. Auioird'huy il faut y aller avec autre dessein, estans les choses en autres termes.

A la troiesme, qui se tire de la paix que le Roy entretient avec les infideles, se respond. Que si le Roy ne prend pas conseil de faire la guerre aux infideles, les guerres de son Royaume en sont peut-estre cause : si son Estat estoit trou à fait en paix, il auroit temps & moyens de faire la guerre

aux infideles aussi loüablement & plus heureusement , & peut estre que ceste guerre là rameneroit à l'obeissance tous les desobeïssans de son Estat.

A la quatriesme fondée sur l'honneur de Dieu, & sur l'autorité royale, qui toutes deux semblent attaquées & blessées; Se respond que il est vray que ceste secte s'esleue contre Dieu , puisque contre son Eglise, & s'esleue encores contre l'autorité Royale en quelque façon : mais il y a & conseil de Dieu mesmes, d'en venir à bout, pour ce qui le regarde , autrement que par la violence, & le Roy peut de mesmes prendre conseil d'en venir à bout pour ce qui le regarde , autrement que par la violence aussi.

A la cinquiesme , qui se prend des succez que le Roy a eus les deux annees dernieres, se respond , Que le Roy a eu trois sortes d'yssues en ces entreprises depuis deux ans, quelques villes luy ont volontairement ouuert les portes, comme Naurrins, Pons, Bergerac, & plusieurs autres, quelques vnes ont esté prises par luy, par si ges; comme saint lean, Clerac, & autres. Montauban luy a resisté.

Sur toutes les trois sortes, il peut prendre sage conseil de n'employer pas la for-

ce cy apres: De la premiere, parce que toutes les places qui luy voudront rendre obeissance volontaire, il doibt les traicter si fauorablement, que non seulement elles se treuuent heureuses d'auoir pris ce bon chemin, mais y induisent les autres par exemple, encores qu'en rendant l'obeissance elles ne payent que ce qu'elles doiuent, il ne faut pas laisser de leur dire grand mercy de bon cœur, comme on fait à vn mauuais payeur, qui vous payant volontairement, vous espargne le temps, la peine, & la despêce. Tout ce que le Roy peut auoir de ses subiects par amour, bien que le plus iuste du monde, il ne faut iamais qu'il essaye de l'auoir par force.

La premiere & plus certaine iustice, est de receuoir doucement & gracieusement ce qu'on donne gayement & volontairement. Dieu luy-mesme en vse ainsi.

De la seconde, le Roy doit mesurer non ce qu'il a gagné en prenant vne ville, mais ce qu'il a perdu: car il ne gagne rien quand il prend vne ville dans son Royaume, & il perd tout ce qu'il employe pour la prendre; & qui plus est, il perd encores tout ce qui s'employe dedans pour la deffendre: Car tout estant à luy dehors & dedàs, tout vient au bout du compte à sa perte.

De la troisieme, qui auroit bonne seur-
 reté de pouuoir forcer Montauban pour
 luy faire payer la rebellion de l'annee pas-
 see, il y auroit apparence d'en prendre le
 dessein, pourueu que ce fust avec bien
 moindre perte que celle qu'on y feist l'an-
 nee passée sans le prendre. Mais rien de
 tout cela n'est asseuré, supposé qu'il le fust,
 vn Prince sage ne gouuerne gueres son
 Estat par les ressorts de la vengeance. Ouy
 peut estre enuers les voisins ou estran-
 gers; enuers ses propres subiects, non, ie
 n'en ay iamais veu d'heureux exemples: le
 feu Roy s'y prenoit d'un biais tout con-
 traire, & s'en trouua bien.

A la sixiesme, qui se prend des bruits qui
 pourroient courir, si le Roy terminoit la
 guerre commencée par vne conclusion de
 paix; Se respond que le bruiet de peu de
 pieté à vn Roy si deuot, ou de peu de ma-
 gnanimité à vn Roy si courageux, ou de
 foiblesse & de peu de force à vn si grand
 & puissant Roy, ne peut prendre pied ny
 s'estendre aux lieux où l'humeur du Roy
 & ses forces sont cogneuës. Si ce bruiet
 court en quelque endroit, il sera aysé de
 iustifier qu'il vient de ceux mesmes qui
 par haine, enuie, ou dessein qu'ils ont par
 interest particulier contre le bien du Roy-

aume, cherchent de continuer le Roy en vne humeur qu'il n'a que trop, non de pieté, de magnanimité ou de force : Car vn Roy n'en peut trop auoir, mais d'effects non reiglez, de pieté, de magnanimité, & de puissance. On trouuera que les Espagnols qui durant nos diuisions s'agrandissent dans nostre voisinage, & nous ayans bouché les passages de la Valtoline & de Iulliers, se preparent pendant que nous inuestirons Montauban ou la Rochelle, d'inuestir nostre Royaume tout à l'étour, feront courir ce bruiet là par aduance par leurs partisans : A tels bruiets on pourra doucement respondre que c'est vne vraye pieté à vn Roy de prendre vne voye de gagner, & cōuertir avec le temps tant d'ames desuoyees, que nulle force ne peut vaincre en ce qui est de la foy & de la croyance, au contraire les fait endurcir & opiniastres. Magnanimité & puissance de se faire ouurir les portes de ses villes à vn seul commandement, & avec la croye d'un Mareschal des logis, que toute la Chrestienté ne feroit pas ouurir avec des balles de canon. Hors du Royaume, il seroit plus honorable au Roy d'estre victorieux : Dans le Royaume, il luy est plus honorable d'estre obéy.

A la septiesme, qui se prend de la memoire & de l'exemple des faits du feu Roy, se respond, Que le feu Roy reconquit sans doute par la valleur son Royaume contre ceux qui luy refusoient obeïssance. Mais on peut dire qu'il le reconquit aussi par sa douceur, bonté, & prudence. Si les huguenots refusoient absolument au Roy l'obeïssance ou la recognoissance, il faudroit que toute la Frâce ensemble courust les exterminer dans leurs tannieres: s'ils demandent en termes de subiects d'obeyr, presuppposé qu'ils desirent quelques conditions qui ne sont en soy raisonnables à eux à demander, le Roy ne laisse d'auoir raison de leur accorder, s'il luy plaist: Les Roys precedans les ont approuuees, le Royaume les a supportees. Faire en vn instant vn changement tout entier, est tres-mal aysé. Conuertir tous les heretiques en mesme temps, est impossible: leur oster absolument la crainte & la defiance, l'est encores plus: leur dōner ce qu'ils n'ont point eu iusques icy, qui est le desespoir & le mespris de l'autorité Royale, est tres-perilleux. Nous vismes durant la ligue que le feu Roy peu à peu assura les deffiances, osta les craintes, fit etuanoüir les soupçons; par ce moyen regna puissamment sur tous.

Aux raisons apportees pour l'vtilité se peut respondre: Aux quatre premieres qui se tirent des biens & commoditez dont iouyroit le royaume, si sans aucun schisme ou diuision de religion il se maintenoit en paix, sous l'obeyssance d'vne seule Eglise, dans la suiecttion deuë au Roy: Se respond qu'il y a difference à mesurer ce qui sera vtile quand il sera faict, ou ce qui sera entrepris vtilement. Il n'y a gueres d'hommes à qui il ne fust vtile d'auoir vne maison bastie, il y en a peu à qui il fust vtile d'en bastir vne. Ainsi les quatre premieres raisons sont ou vrayes, ou vray semblables en leur fin, presuppосée certaine, mais non en leur entreprise: partant ce qui est mis en question est certain à desirer; mais fort problematique à conseiller, encores plus à esperer.

A la cinquiesme qui se prend de la foiblesse qui se recognoist dans le parti Huguenot, & au contraire la force, puissance du party Catholique, appuyé de l'autorité royale, & commandé par vn Roy tel que nous l'auons. Se respond que toutes ces rencōtres sont veritables & certaines: Avec cela l'exemple de l'annee passée est capable de partir le conseil. Croïe & Vienne furent autrefois la proye imaginee de
deux

deux tres-puissants Monarques : autre fut l'issue. Dieu ne iuge pas tousiours comme les hōmes : quelquefois il fauorise par iustice manifeste , quelquefois par volonté particuliere. Le Roy n'a pas droict mieux fondé dans S. Iean, que dans Montauban. Dieu luy soubmit la premiere , & non la seconde. Il veut que nous esperiōs tout en luy, neantmoins il ne veut que nous prenions nos desseings que proportionnez aux moyens humains qu'il nous donne, car il nous les donne pour sur iceux & suivant iceux entreprendre & former tous nos desseings.

A la sixiesme qui marque que les deux chefs plus estimez , dont les Huguenots puissent faire estat, sōt iusques auioird'huy fideles & obeyssās au Roy; Se respōd que cela est encores veritable , mais cest aduantage doit estre plustost employé au dessein de la paix que de la guerre: nul des deux ne fera mal pourueu qu'on le mesnage bien : L'un le tenant dans la fidelité qu'il a de nouveau promise au Roy , sans luy dōner ny occasion ni moyen de s'en departir : L'autre, luy donnant & occasion & moyen non seulement de ne point mal faire , mais au contraire, de bien faire. Au premier, on ne peut luy oster ny le moyen, ny la volonté de mal

faire, quoy qu'on die qu'en le rendât instrument de la paix, à laquelle il pourra & voudra travailler utilemēt. Dans la guerre, il fera du mal assésurément, il y a lieu de l'employer honorablement à la Valtoline, avec vne partie de ceux qui ayment la guerre tāt d'un party que d'autre: C'est le conseil qu'il faut prendre. Pour l'autre, on s'en doit servir comme d'un instrument à toute sorte de bien, si on le sçait bien employer. Pour cet effect, semble que le Roy prendra vn tres-bon conseil de luy faire sçauoir par vn homme fidele & sage, qu'ayant en estime sa vertu, sa prudence & sa conduite, qui sont appuyees & rehaussées de sō honorable qualité & maison, il le prie d'y adiouster sa conuersion à la Religion Catholique, auquel cas il desire le tenir aupres de luy, avec charge digne de luy, & il n'y en a qu'une de cete sorte.

Si cet honneur est accepté de luy, outre le bon œuure d'auoir tiré ce grand homme à la Religion, on peut esperer de luy diuers bons seruices & dans le Royaume & dehors. Il peut empescher diuers petits orages, qui (tel temps courroit) viendroyent fondre de diuers costez sur nous. Desia void-on vne petite nuee noire sur la frontiere qui nous pourroit bien donner vn esclat de tonnerre, si nous nous escartons trop de la maison

Il seruira d'espece de liaison (dont il ne se trouue quasi aucune) entre les humeurs des zelez Catholiques & des frenetiques Huguenots, d'asseurance & de confiance aux sages des deux partis. Ouurira des chemins d'obeïssance des subiects enuers le Roy, de reconciliation du Roy enuers ses subiects, qui seront agreables à tous les deux, & louëz des estrangers & accourcira bien le chemin. En paix fera diuerses bonnes choses, il est en condition d'age & de santé, qu'il ne peut faire mal, & peut faire beaucoup de bien. Quand la volonté n'y contribueroit rien (ce qui ne se peut imaginer d'un homme de qualité, interessé par parentelles & biens, & protection de sa ville, qui ne peut subsister que par la bienueillance du Roy dans le bien du Royaume) tousiours le rang qu'il tiendrait, l'estat en quoy il est, le soing de ses enfans, & l'honneur qu'on luy auroit fait ne luy permettroient de laisser inutilles les graces & moyens de seruir qu'il a, qui ne sont pas petits. Tousiours est-il le premier Officier.

Si son opiniaistreté ne luy laissoit pas accepter cet offre, tousiours le Roy seroit loué du dessein & du choix de telle personne, & de la mesme offre Catholiques & Huguenots en auroient esgal contentement : nul

des deux partis ne se plaindroit qu'on auroit choisi vne personne au dommage & à la ruine de l'autre party, ou vne personne indigne, & tousiours cela seruiroit.

Aux raisons pour la iustice se peut respondre.

A la premiere, qui porte que si la guerre est honorable & vtile, elle est par conseqüent iuste; Se respond que la iustice en gouuernemens d'estats, tombe tousiours à ce qui est le plus vtile, & le plus expédient pour l'estat: car le Roy est tenu par reigle de iustice de procurer sur toutes choses le bien de son royaume.

A la 2. qui regarde les aduantages extraordinaires que les huguenots veulēt auoir, & sous pretexte d'iceux se desgager en quelque sorte de la subiection & obeyssance absoluë, ce qui ne doit estre souffert; Se respōd qu'il est vray si cela se pouuoit faire sans vn plus grand mal, & vne plus grande perte.

A la troisieme, qui marque les priuileges particuliers que les Huguenots veulēt auoir en qualité d'Huguenots, qui sont leurs garnisons, pensions de Ministres, Colleges, lieux de Temples, & de cimetieres, Assemblies, & Cercles, qui semble iniuste de leur permettre & souffrir; Se respond que cela est aussi tres-vray: mais c'est avec le temps &

la dexterité qu'il faut venir à bout de tout cela, & non avec la force qui peut estre n'y feroit rien, & porteroit la chose aux extrémités.

A la quatriesme qui regarde les villes de seureté qu'ils ont qui doivent estre remises entre les mains du Roy; Se respond que cela se doit encores faire avec dexterité & tēps, en telle sorte que le Roy obey & seruy, leur crainte ostée par la parole que le Roy leur gardera toutes choses reuiennent au plus près que faire se pourra de leur premier estre.

A la cinquiesme fondée sur la confiance absolue qu'ils doivent prendre en la parole du Roy, de laquelle leur seureté doit entièrement dependre, & eux s'y soubmettre clairement; Se respond qu'il est raisonnable, aussi feront-ils tousiours quand ils demeureront sous la iurisdiction & obeyssance du Roy. De leur pouuoir persuader quand bien ils s'asseureroient de la parole du Roy, qu'ils se peuuent assurer contre la mutinerie des peuples, de laquelle ny le Roy, ny les peuples mesmes, ne sçauroient donner assurance autre que celle qu'ils en ont eue iusques à ce iourd'huy; cela est mal-aysé.

Aux raisons pour le necessaire, Se respōd.

A la premiere, qui se tire de l'honneur,

utilité & iustice, presuppofee de la guerre, Que la consequence est veritable, mais il n'est pas question icy de ce qui est cogneu honorable, iuste, & vtile en la fin imaginee certaine, mais de ce qui l'est en l'entreprise quel'on fait de l'executer. La redemption de tous les captifs Chrestiens qui sont entre les mains des infideles, ou l'affranchissement du S. Sepulchre, seroient honorables, vtiles, & iustes: mais les moyens qu'y pourroit employer vn Prince seul, ne seroient iugez peut-estre, ny honorables, ny vtiles, ny iustes, parce qu'ils ne seroient pas iugez suffisans pour en venir à bout.

A la seconde, qui regarde la fin, que peut-estre les huguenots prennent pour le but de leur guerre, qui est de se tirer à la longue de l'obeissance du Roy; Se respond, que peut-estre s'ils en auoient le moyen ils le feroient voirement; L'exemple en est parmy nos voisins; mais il faut examiner si le remede qu'on essayeroit d'y donner par la guerre y seroit suffisant, & pourroit retarder ce malheur, ou plustost l'aduancer; si par la guerre on les porte au desespoir; du desespoir aux derniers efforts, & des derniers efforts à quelque effect extraordinaire.

A la troisieme, qui presuppofe qu'à la fin si on laisse les Huguenots en paix, eux mes-

mesno^r viédrot^t attaquer, Se respōd, qu'aux termes où sont les affaires en France, & encores par tout la Chrestienté, s'imaginer que les huguenots puissent quelque iour estre capables de donner la loy au surplus du Royaume, c'est estre hors du sens. En la personne du feu Roy, si vaillant & si magnanime, ceste doute fut esclarcie, si cela eust peu auoir lieu, c'eust esté par ses mains. Le bon Capitaine la Noüe luy dit au siege de Chartres en presence de quantité d'hommes des deux Religions, qu'il deuoit tenir deux maximes pour certaines & indubitables, l'vne Que iamais Huguenot ne seroit Roy absolu de France, l'autre Que iamais les huguenots ne porteroient plus auant les armes en guerre ciuille, qu'à la cōseruation de leur liberté de conscience : ceste parole sortie de la bouche d'un homme grandement estimé de tous, & plus que de nul autre, du Roy mesme, le persuada puissammēt & l'achemina à deux resolutions, l'vne bonne, qui fut de se faire instruire, qui fut vn grand bien pour le Royaume, & vn plus grand pour luy; l'autre mauuaise, qui fut de se relacher iusques-là par confiance, qu'estant paisible, il permit aux villes desia assez fortes, de se fortifier encore plus, & se mettre en tele estat qu'ils croyent pouuoir impu-

nement payer la trop grande indulgence du pere en rebellion cōtre le fils. Or en vn mot, si les Huguenots sont capables de prendre le desseing de maistriser l'estat, ils le prendront aussi tost cete fois qu'une autre. La paix ne leur donnera pas plus de moyen de le faire à l'aduenir, au contraire leur fera tomber peu à peu les armes des mains, & les rebellions de la teste; que la guerre leur y fourre de plus en plus, en despit mesme que la plus part d'eux en ayt.

Et outre les particulieres respōses aux raisons cy dessus, se peut respondre en gros à ceux qui conseillent la guerre, & la maintiennent honorable, vtile, iuste, & necessaire au Roy & aux Catholiques, qu'ils se doient donner garde que leur conseil luyuy ne face tout au rebours trouuer la guerre du costé des Huguenots honorable, vtile, iuste, & necessaire.

Les deux premiers par les effects, les deux derniers par l'opinion du monde, puis qu'on ne veut les receuoir à obeissance & pardon, & qu'ils n'ont autre moyen de seureté de leur vie & biens.

Car encore que ce pretexte soit faux en ce que nul subiect ne doit sous quelque cause que ce soit s'esleuer contre son Roy; & captieux, puis que le Roy les assure par ses

Edicts,

Edicts, desquels ceux des prouinces de deça se contentent, & en iouissent, néantmoins les serrer trop pour rendre les villes d'hostage, & abbattre & desmollir toutes leurs fortifications, leur peut donner quelque iuste crainte de leur vie, & la iuste crainte de leur vie, quelque apparence coloree de garder leurs villes.

Car pourquoy demande on de Montauban & de la Rochelle ce qu'on ne demande pas d'Orleans & de Troyes, si Montauban & la Rochelle veulent obeïr comme Orleans & Troyes?

Donc la paix se doibt & peut faire en cette sorte:

Que demeurans dans l'entiere subiection & obeïssance, on leur laissera leurs villes entre leurs mains, chacune iouyssante des anciens priuileges qu'elle auoit, desquelles villes ils respondront au Roy, & s'en rendront depositaires, à peine de confiscation de tous leurs biens, à laquelle ils se soubsmettront volontairement & par traicté. Dedans y obeyront au Roy en toutes choses, ausquelles celles de la mesme prouince, & de leur voisinage, obeyssent. Payeront mesmes tributs & charges, garderont mesmes loix; le tout s'ils n'ont anciennes exemptions toujours continuées au cōtraire. Entretiendront

les Edicts, n'auront nulle garnison dans les villes. Dans les anciennes forteresses, les anciens mortepayes seulement. Desmoliront les nouvelles fortifications de chasteaux, & petites places par eux occupees: Les grandes villes seulement demeureront fortes, & fortes des fortifications faictes deuant la mort du feu Roy, car ils n'ont que faire de villes si fortes dans le royaume, s'ils ne veulent point rebeller. Pour les mouuemēts des peuples sedicieux qui leur pourroyent courir sus, des simples murailles suffiront, & le Roy les tiendra en protection de ses Edicts, & de sa parolle, tant qu'ils seront obeyssans. Les chambres de l'Edict mises & reiglees le plus commodement qu'il se pourra. Commandement estroict de rendre iustice sans distincțiō de religion, & d'empescher tous scandales & actes qui peuuent esmouuoir plaincte & sedition. Leurs assemblees permises de temps en temps, mais point ailleurs que dans Paris, afin qu'il soit sçeu du Roy, & de toute la France, qu'il ne s'y traicte rien que suiuant leur deuoir de subiects, & que ce n'est l'assemblee d'un party, mais d'une secte & sorte d'hommes separez du reste du corps, non quant à la subiection, commerce ou mœurs exterieures, & politiques, mais quant à la croyance & forme de serui

ce diuin seulement. Les assemblees particulieres pour deputer se feront sur les lieux, par le congé des Gouverneurs ou des Parlemens.

Tout le reste des differens sera aisé à accorder. Quand ils demanderont moins, ils tesmoigneront au Roy plus de respect & d'obeyssance qui meritera de luy plus de bienveillance & de gratuité. Quand le Roy leur donnera plus, ils devront se sentir plus obligez à sa bonté, & luy en demeurer plus fideles: ainsi de nul costé on ne se pourra plaindre, & tousiours faut qu'ils reconnoissent que ce qu'ils obtiendront du Roy leur sera octroyé par concessiō pour en iouir tant qu'ils seront obeyssans, non pour en faire loy ou consequence.

A toutes les raisons cy dessus, en response des raisons alleguees pour la guerre, se peuuent adiouster les raisons pour la paix. Elles sont de longue main cogneuës, & toutes claires.

1. Dans la paix le Roy est seul Roy dās son Royaume de nom & d'effect. Dans la guerre ciuille il y a plusieurs Roys, non de tiltre ou de droit, mais d'effect.

2. Dans la guerre ciuille tout ce qui s'y ruine, soit par la mort des hommes, qui sōt ordinairement les meilleurs, soit par la perte

des biens d'une part, & d'autre tombe tousiours au dommage du Roy & du royaume.

3. Les estrangers en font leur profit, & y prennent leur mire pour nous coucher en jouë.

4. Ceux qui la conseillent, la conseillent pour leur profit particulier qu'il preferent à la desolation du royaume que la guerre apportera: laquelle desolatiõ fera tost ou tard faire la paix entre les deux partis tous deux lassez & harassez: Ce pendant le dommage qui en sera prouenu ne tombera que sur le Roy seul, qui paye à la fin tous les despens, & faut qu'il les paye, car nul ne les peut payer que luy, & faut qu'il les paye trois fois, vne fois à ceux qui l'ont seruy & suiuy, vne fois à ceux qui luy ont fait la guerre, & vne fois aux peuples qui en ont esté ruinez; & s'il ne le fait, encores dit-on qu'il a tort, puisque tous trois sont ses subiects esgallement, & que le Roy ne se peut plaindre, puis qu'il n'a pas voulu plustost se mettre hors des termes de debuoir payer tous ces despens; C'est à dire, qu'il n'a pas voulu faire la paix quand il n'y auoit encores rien de trop gasté.

5. La guerre ciuille ne peut qu'elle ne soit inutile, & sans fruct, si sans la guerre le Roy peut auoir l'obeissance des subiects, qui est tout ce qu'il aura apres la guerre finie à son

aduantage; car plus de droict ou de tiltre de souueraineté n'aura-il pas dans Montauban apres l'auoir pris, qu'il en a à ceste heure.

Mais aura il pas lors plus d'obeissance de ceux de Montauban, qu'il n'a à cete heure? Ouy sans doubte; car s'il les prend de force, il fera mettre tous les habitans à la chaisne, s'il veut: Auquel cas il faudra qu'ils obeissent plus serré qu'ils ne font à cete heure, & qu'ils ne feront iamais par aucun traité de paix: Mais cete façon d'obeissance, ny quelle qu'il ait d'eux par la force, ne luy sera iamais si vtile que celle qu'il peut auoir d'eux par la paix; car ils ne sçauroyent, apres auoir souffert la force seruir le Roy avec tant d'honneur, de profit, & de plaisir pour luy, qu'ils peuuent faire à cete heure. Qui ne cōstitue-
ra l'honneur, le plaisir, & le profit à la seule vengeance? A ce seul desseing la guerre sera aduantageuse, pourueu qu'on soit asseuré de venir à bout de ce qu'on entreprend; A nul autre ne le peut estre.

La guerre donne trois qualitez aux subiects que les Roys doiuent grandement craindre de voir en eux. Elle les rend Orgueilleux. Car par la guerre ils traittent du pair & compagnon avec leur maistre: de part & d'autre esgalemēt fâsares de trompette, & coups de canon: qui n'en a pas tant

de son costé a de fortes murailles en recompense. On fait vn bandon dans le camp de par le Roy, & à vn quart de lieuë de là vn autre de par monsieur de Rohan, ou de la Force, & peut estre de par monsieur le Maire de la ville, & tousiours vainqueurs ou vaincus, les subiects rebelles ont le plus grand honneur: C'est plus grand honneur à vn Capitaine d'auoir defendu vne ville contre le Roy, qu'au Roy d'en auoir pris cent; Que s'il la defend & la garde sans qu'on la prenne, encores mille fois plus. Fuir deuant le Roy ou luy rendre vne place, n'est pas honte pour les subiects; tenir teste est honneur, duquel bien que meslé avec l'exécrable peché de rebellion, on rend aysément les subiects si friands par la voye de l'orgueil, principalement quand la loüange des armes y est meslee, qu'ils ne veulent plus iamais faire autre chose, & s'endurcissent en ceste frenaisie, & gare le heurt apres.

Desesperez: Car croyans qu'ils ne peuuent auoir salut que par se bien defendre, ils s'y resoluent, & le croient, quand ils voyent qu'on leur fait perdre toute esperance de paix: & contre des desesperez, il y a tousiours à perdre, & iamais rien à gagner.

Aguerris. Or ceste qualité qui de soy est bonne, est tres-dangereuse aux ennemis,

& toutes trois encores plus dangereuses aux proptes subiects, quād de loyaux subiects ils sont deuenus ennemis.

Quel doncques semble le meilleur conseil? Faire la paix, leur en proposer des cōditions telles qu'on peut donner à des subiects, demeurans dans l'entiere subiection; s'il faut vn peu guerir leur defiance, afin qu'ils ne fassent point barriere de la crainte de leur vie. eh ! bien. A cela il leur faut & promettre & tenir loyalle seureté, les faire traicter par tout esgalement en leur vie & biens, comme les autres subiects, sans distinction. En tout ce qui est de la iustice de mesmes. En ce qui est des gratuités, ils n'y peuvent ny n'y doivent contraindre le Roy, sinon autant qu'il iugera aux occasions que leur fidelité & seruice l'auront meritē. S'ils sont si temeraires de vouloir s'opiniastrer au contraire, c'est lors qu'il y faut mettre la derniere main : Cependant les supporter vn petit, les laisser doucement reuenir à eux, oublier le passé, gaigner les meilleurs par caresses & bien faicts, tenir parole sincerement enuers tous, faire chastier exemplairement dans les prouinces ceux qui par audace enfreindront les traictez. Ce qui se faict souuent d'vn costé & d'autre à dessein de remettre le Roy aume en combustiō & de

r'allumer la guerre. Sur tout ne leur donner point subiect de venir à chaque fois faire plainte au Roy, & luy demander iustice.

Mais reste la plus grande & derniere difficulté, le moyen pour paruenir à ceste paix. Elle sera iugee vtile par la plus grande partie des bons & des sages. Ceux qui la voudront empescher & n'oseront le faire ouuertement, y trouueront des obstacles au traicté : c'est en quoy on est d'ordinaire le plus empesché ; car quand on est assemblé, nul des deux partis qui sçauent le blasme qui accompagne les traueses qu'on a donné par opiniastrété à vne si bonne cœure, & les malheurs qui suivent vn tel reproche, qui sont les haines & les defiances de tous ceux du party, & les maledictions de tout le monde ne veut iamais tomber en ce malheur, & par ainsi tout s'accommode à la fin.

Mais auant ques'assembler pour en traiter, il y a infinis moyens pour empescher cete assemblée. Les Espagnols & Holandois y furent plus de deux ans lors qu'ils firent la trefue, combien de temps y fut-on en France durant la Ligue? autant que la ligue dura, on commença à proposer la paix au sortir de Diepe 1589. on ne fit la trefue qu'en l'an 1593. la paix qu'en l'an 1595. à la fin.

Cela

Cela vient de ce qu'il semble qu'il est peu honorable, principalement au maistre ou au plus fort, de parler le premier de paix, & sous pretexte de cet honneur, on trouue mille moyens de destourner ou empescher la Conference. Au contraire chacun confesse qu'il est honteux de vouloir s'opposer au traicté de paix, quand on a commencé à la proposer, c'est pourquoy on ne s'assemble gueres qu'on ne la conclue. Monsieur de Villeroy medita Lodun qu'il auoit assisté à 19. traictés de paix, qu'il n'auoit iamais trouué moyen aisé & facile pour faire conuenir les parties à vouloir s'assembler pour traiter la paix, ny moyen difficile & malaysé pour la conclurre, quand ils estoient assemblez.

C'est pourquoy la plus grande difficulté sera à trouuer les moyens de s'assembler pour la traicter : Ceux qui ne la desirent du costé du Roy, diront

1. Que le Roy ne doit pas ployer à resmoigner qu'il vueille la paix.
2. Qu'es'il s'y laisse entendre, cela rendra les Huguenots plus orgueilleux & plus opiniaistres.
3. Que c'est faite tort à son autorité.
4. Qu'il ne doit seulement ouyr parler de traicter avec des subiects, tout ce qu'il peut

faire est de les receuoir, sans autre capitulation à simple pardon, & à nuë obeissance, laquelle s'ils n'enuoyent purement offrir, il ne doit les escouter.

5. Qu'il ne doit traiter avec eux comme avec vn corps, attendu qu'il y a distinction expresse entre les Huguenots obeissans, qui viuent sous la protection du Roy, & desaduouient les autres, & les Huguenots rebellans.

6. Qu'encores parmy les Huguenots rebellans il y a distinction; car l'vn peut pretendre des priuileges particuliers, comme la Rochelle; l'autre des iustes craintes, cōme les villes non fortes; l'autre des interests d'accords, de concessions, de Chambres de Parlements, & autres choses: Partant pour toutes ces raisons ils ne doiuent traicter en corps, mais chaque ville en particulier.

7. Que nul de leurs chefs n'est capable de traicter pour autre que pour luy mesme, parce qu'il ne peut auoir pouuoir de tous les autres. Ainsi donc qu'il ne se peut traicter valablement. Car de reduire les choses de traicter avec chaque personne, ou avec chaque ville separement, sera reduire les choses à ne traicter iamais. Ce seroit vne confusion, & vne longueur trop grāde. D'ailleurs traictant avec vne partie, ne faudroit laisser de

contraindre l'autre par les armes : ce qu'eux preuoyans, ne voudront iamais traicter que vnis. Ce qui ne se pouuant faire pour les raisons que dessus, qu'il vaut donc mieux n'entendre à aucun traicté, mais suyure sa poincte.

8. Qu'ils se veulent seruir du pretexte du traicté pour prendre langue des intentions & forces du Roy, pour suyuant cela prendre leur party. Au lieu de traicter, qu'il faut aller à eux.

9. Que le traicté ne seruira qu'à leur dōner temps de se mieux munir de fortifications, d'hommes, viures, armes, munitions.

10. Qu'ils ont sollicité les estrangers de se ioindre à eux, & les assister en leur cause; partant ne doiuent estre receuz à traicter avec leur Roy.

11. Qu'ils n'ont gardé les promesses qu'ils auoyent faictes, tesmoin Soubize, ceux de Monheur, Clairac, Sainte-foy, les entreprises sur Nauarrins, Bergerac, & beaucoup d'autres qui se peuuent rapporter.

12. Et finalement ceux qui desirent la guerre descrieront ceux qui donneront conseil de paix au Roy, & les chargeront obliquement de blasme & de mespris, comme s'ils auoyent intelligence avec les Huguenots, regret de n'auoir point de grandes charges

dans la guerre: ialousie contre ceux qui en ont, crainte de leurs biens s'ils en ont en lieu guerroyable, & autres reproches.

A tout cela se peut respondre.

A la premiere, qui porte que le Roy ne doit ployer à tesmoigner qu'il desire la paix; Se respond, Qu'au contraire, la premiere loüange qu'on peut donner à vn Roy, est qu'il desire que ses subiects, comme vn bon pere ses enfans, soyēt en leur deuoir enuers luy, & par consequent, bien avec luy.

A la seconde, Que leur offrir la paix est les rendre plus orgueilleux & opiniastrés; Se respond qu'ils sont desia orgueilleux & opiniastrés iusques au dernier degré, puis qu'ils soustiennent la guerre contre leur Roy. Le tesmoignage de sa bonté les obligera au contraire (aux termes que sont les affaires) à se soubmettre à sa volonté, & se confier en ses promesses.

A la troisieme, que tesmoigner par le Roy qu'il veut la paix, fait tort à son autorité; Se respond que cela seroit vray si lui autrement que comme Roy traictoit avec eux autrement que comme avec ses subiects; ou eux autrement que cōme subiects traictoiēt avec luy autrement que cōme avec leur Roy.

A la 4. qui porte que le Roy ne doit faire aucun traitté avec eux, seulement les rece-

uoir à simple pardon & obeyſſance; Se reſpond qu'ils n'enuoyeront pas offrir l'obeiſſance en general, car ils recognoiſſent qu'elle eſt deuë, & qu'elle a touſiours ſubiſté, ou deu ſubiſter: Ce qui eſt bien plus, Traicter avec eux ſur le pardon du paſſé, & ſeuretez pour l'aduenir, eſt choſe qui s'eſt faiçte pluſieurs fois en Frâce, & ailleurs, par les princes enuers leurs ſubieçts, ſans diminution de l'authorité ſouueraine.

A la cinquième, Que le Roy ne doit traiter avec eux comme avec vn corps; Se reſpond qu'il ſeroit bon que ce ne fut plus vn corps, c'eſt à quoy il faut tendre pour l'aduenir; pour le preſent cela ne doit empeſcher le bon œuvre de la paix.

A la 6. qui porte qu'il y a diſtinction entre les Huguenots rebellans, car ils ont diuers priuileges, & diuers intereſts conſiderables; Se reſpond qu'on doit garder les anciens priuileges, & en ce qui ne bleſſera point l'authorité du Roy, ou le bien general du royaume, aſſeurer les deſſiances, & reigler leurs intereſts; pour telles choſes on fera articles particuliers pour les prouinces ou villes particulieres.

A la 7. qui porte qu'il eſt impoſſible de traiter avec eux, parce qu'ils n'ont point de chef capable de traiter pour tous; Se

respond en gros & en general que le Roy veut que tous ses subiects luy obeyssent, en luy obeyssant qu'ils vivent en paix, il donnera la paix à tous, chacun en sentira le fruit.

A la 8. qui porte que les Huguenots prennent aduantage du traité de paix; se respōd que cela seroit vray si cependant on tenoit les bras croisez: mais il faut tenir la plume d'une main, pour signer la paix, de l'autre; l'espee pour leur donner sur les oreilles s'ils font les fascheux, & laquelle il faudra à mesme temps faire iouer ouuertement, sans aucune relasche ny misericorde.

A la 9. qui porte que le traité & ouuerture de paix leur donne loisir de se fortifier & munir de tout; Se respond qu'il ne faut pas douter qu'ils ne soyent tres bien aduertis de tout. Aux guerres ciuiles, les espions ne manquent iamais, ioinct qu'il n'est plus de saison d'essayer de les auoir par la ruse ou par la surprise.

A la dixiesme, fondee sur les pratiques & intelligences qu'ils ont eues, ou voulu auoir avec les estrangers; Se respond, que le plus court moyen de les faire renoncer aux pratiques estrangeres, & de les reünir volontairement à la premiere subiettion & obeissance, est leur donner la paix.

A l'onzieme, fondee sur ce qu'ils n'ont gar-

dé en beaucoup de choses les promesses qu'ils auoyent faictes, Se respond que ce qui a esté fait contre le droict accoustumé de la guerre, se peut examiner separement, vne partie excuser, vne partie pardonner, vne partie comprendre sous le traicté. Et sil y a quelque petit chastiemēt qui reste à faire, estre donné à la clemence du Roy, au bien de la paix, à la priere des intercesseurs, ou à quelqu'autre couleur gracieuse; cela ne doit empescher vn bien general.

A la douziesme, qui regarde les calomnies dont on chargera & deschirera ceux qui voudront persuader ou s'entremettre de la paix; Se respond que ceux qui ont en teste & pour but vn desseing hault & magnanime, tel qu'est celuy du bien de tout vn Estat, doiuent estre munis d'une magnanimiré respondante à leur desseing, qui leur doibt faire mespriser non seulement les reproches qu'on leur pourroit faire, mais les personnes mesmes qui leur font la reproche, qui resmoignent de l'enuie & de la malignité en leurs propositions, puis qu'ils prennent à tache de contrarier vne chose bonne; cela ne doibt retarder les gens de vertu & de courage qu'ils ne continuent plus vigouresement la carriere qu'ils ont entreprise. Fabius Maximus fut taxé par les ennemis de trahison,

par les siens de p^{er}il tronnerie. Il ne fieschist point à ces bruits là, & perseuera à sauuer l'Estat Romain. Ceux qui conseilleront la paix en auront l'honneur à la fin, si leur conseil est par l'issue iugé vtile; comme il sera (à mon aduis) soit qu'on le suyue, soit qu'on le refuse. Si les hommes ne la font à cete heure Dieu la fera en son temps, ou ie me trompe.

Quoy dont? le Roy fera il vne paix honreule avec ses subiects? La paix, ouy; hõteuse, non. Entre vne guerre calamiteuse & ruineuse & vne paix hõteuse il y a des milieux: Sile Roy y employe des hommes sages, vertueux, & non interessez, ils en trouueront les moyens faciles.

Qu'ils soyent recogneuz tels de ceux qu'õ veut ramener à raison, ils y prendront confiance, & se mettront en leur debuoir; c'est le seul secret.

Mais parce que (comme i'ay desia dict) la plus grande difficulté tombera sur la forme & moyens de traicter la paix, sur ce que du costé du Roy ceux qui ne l'approuuent, ou ne la desirent pas, pour l'empescher prendront pretexte de la grandeur & dignité royale, qui ne doibt pas iusques là s'abbaisser de demãder la premiere la paix à qui que cẽ soit, moins à ses subiects; & que du costé des Huguenots ceux qui ne la desirent pas
aussi

aussi (car il y en a trespeu entr'eux qui en leur
 amela desapprouuent) prendront pretexte
 que s'ils demandent les premiers la paix, ils
 resmoignerôt tant de foiblesse, qu'on cher-
 chera plustost en se hazardant de les acca-
 bler, qu'en s'assurant de les reünir: & que
 par cet obstacle nul traicté ne se fera, puis
 qu'il est impossible que deux parties tōbent
 en accord de quelque affaire si l'vne ne le
 propose à l'autre, ou si vn tiers n'est interpo-
 sé comme mediateur. Or en cecy il n'y peut
 auoir de tiers ou de mediateur. Entre les
 François nul ne le peut estre, car tous les
 Huguenors (i'entends ceux qui rebellent &
 soustiennent la guerre) sont ennemis; tout le
 reste des François sont seruiteurs, & par cō-
 sequent partisans du Roy. Entre les estran-
 gers il n'y en peut auoir non plus. Tous les
 autres princes estrangers ne doiuent en for-
 te du monde estre admis à demãder ou pro-
 poser la paix entre le Roy & ses subiects, ny
 seulement escoutez, sinon entant qu'ils of-
 friront leur seruice & assistance au Roy s'il
 en a besoing, comme ils y sont tenus. Le Pa-
 pe, qui seul entre les princes estrangers ne
 peut estre dict estranger, puis qu'à cause de
 l'Empire spirituel qu'il tient sur les Catho-
 liques il est tousiours entr'eux le mediateur
 legitime & non recusable en ce qui est du

temporel (quand il est luy-mesme hors d'intérest temporel) ne peut neantmoins icy estre mediateur, parce que sur les heretiques & schismatiques qui ont abiuré l'obeissance au Sainct Siege il n'a nul pouuoir que pour les condamner: partāt ne peut traiter pour eux, estant luy-mesme leur vraye & irreconciliable partie.

Pour resouldre cete difficulté, ie maintiens qu'il n'y a qu'un bõ & honorable expediēt, pour lequel esclaircir & iustifier, premiere-ment ie pose en faiēt, que celuy des deux qui tesmoignera le plus desirer la paix, tesmoignera plus de magnanimité & generosité. C'est generosité aux Huguenots de tesmoigner que presuppósé qu'ils peussent se rebel- lans se soubstraire de la subiectiõ & obeis- sance (ce qu'ils scauent pourtant qu'il sera trouué impossible & faux) neantmoins ils proposent d'un desseing volõtaire se reme- tre & demeurer dans la iuste & legitime subi- ectiõ: Cete loiauté de vouloir franchemēt obeir à son Prince legitime est entre toutes la plus noble & plus releuee piece d'un cœur de gentilhomme. La préuue en est qu'elle produit tousiours infinis effects de magna- nimité de diuerses sortes, iamais nul de las- cheté. Or cete loyauté, que nous pou- uons appeller ancienne, puis que de temps,

en temps les François en ont esté si ialoux, encore qu'en particulier elle soit fort abastardie dans le proceder de ceux de ce siecle, en gros neátmoinstient tousiours bon dans les conseils vniuersels; ie dis mesme parmy les Huguenots, & specialement parmy la Noblesse, de laquelle, quoy qu'il y ait, les villes de leur party ne se sçauroyent separer, ny sans elle se defendre, ou resister. Or le pl⁹ grand creueccœur qu'ils ayent en la guerre qu'ils soustiennent, est, qu'ils la soustiennent contre leur Roy: Ie le sçay de sciēce & d'experience, ayant autrefois passé par là: & leur religion qui par societé & opiniastreté les induict à rebeller, par doctrine leur defend absolument; ie dis doctrine nullemēt ignoree ou debattue par aucū d'eux; sibien qu'ils peuuent estre aisement conduits par ceste maxime au desir de perseuerer dās la loyauté, & par consequent au desir de la paix: & encore en suyte au desir de demãder & vouloir la paix; Car ceste demande est tousioursensee & reputeē, à leur iugement mesme, honorable à des subiects enuers leur Roy.

Mais ie dis & soustiens aussi que c'est la premiere & plus certaine marque de magnanimité au Roy de desirer & procurer la paix. Si sa charge l'oblige de conseruer la vie de ses subiects, mesmes avec le hazard de la

sienne, qui seroit sans doubte vn effect de rare magnanimité, elle l'oblige encores de mesmes de leur conseruer la vie par la voye de la paix, avec non moindre loüange de magnanimité. La grandeur, dignité & maiesté royale ne se peut dire rabbaissée pour auoir procuré avec vn desir ouuert & manifeste de sauuer la vie à tant de milliers d'hōmes que la guerre fera mourir, & empesché tant de hontes, miseres, & calamitez qu'elle produira. L'honneur du Roy, dont on fait barriere, se doibt conseruer entier; mais ouy dans le traicté de paix, nō par le tesmoignage qu'il rendra de ne la vouloir pas: & pour preuue il faut auant tout tenir ces deux maximes pour constantes & certaines: L'une, que si le Roy ne pouuoit par la guerre entierement desfaire & exterminer les Huguenots, ce ne seroit pas honneur à luy de la commencer contre eux. L'autre, que s'il les peut ruiner & exterminer, ce sera en quelque sorte honneur; consideré simplement & sepurement, Pangonné & mis en balance avec celuy de les sauuer, n'est plus hōneur, mais tres-grand blasme. Quelle loüange seroit celle qui seroit dōnée à vn Roy d'auoir exterminé quantité d'hommes qu'il auroit peu sauuer, specialement d'hommes ses subiects?

Qu'est il donc de faire? voicy mon aduis, qui se trouuera ou par le commencement ou par la fin le plus profitable & le plus honorable. Premièrement il faut demeurer là, que la paix est preferable à la guerre. La paix se doit desirer par vtilité, la guerre se doit faire par nécessité, c'est à dire en cas d'impossibilité de paix. Vouloir mettre en balance esgale la simple proposition de la paix ou de la guerre, est errer aux principes: Donc le Roy ne doit ny craindre, ny feindre de dire qu'il veut la paix; faisant voir quād & quand q̄ s'il ne la peut auoir, qu'il sçait & peut faire la guerre: & faut partant separer le conseil de l'affaire presente en deux; l'vn pour resouldre a quelles conditions le Roy dōnera la paix aux Huguenots, l'autre (en cas que la paix ne se face) pour resouldre de quelle façon on leur fera la guerre.

Pour le premier, le Roy doit assembler nombre d'hommes d'aage & d'experience, sages, loyaux & fideles, de probité cogneuë, qui par leur fortune & leurs affaires domestiques tesmoignēt qu'ils n'ont iamais cherché leur aduancement, ny adheré à la corruption; c'est la seule preuue qu'on peut au iourd'huy prendre du cœur & de la volonté des hommes, & de l'integrité des Conseils qu'ils donneront, & qui ne sont co-

gneuz que par la seule louange de vertu incontaminee que chacun leur donne, dont il y a encore quantité dans son Estat, Dieu mercy.

Auec eux le Roy examinera les conditiōs de paix qu'il doibt donner aux Huguenots, mettant sur le tapis toutes les circonstances qui y doiuent apporter poids. Deuant toutes marchera l'honneur du Roy, son autorité, l'obeïssance qui luy est deuë: en suite la conseruation de tant de subiects; qui d'un costé bien & doucement mesnagez, peuuent vtilement seruir par de là mesmes ce que l'on demandera d'eux, si le cas y eschet; de l'autre qui trop pressez & outrez, peuuent par desespoir se cabrer, & par ainsi tousiours porter preiudice à l'Estat, ou par leur iniuste rebellion pleine de violences, ou par leur immisericordieuse ruine pleine de dommage. Examiner les traictés de paix qu'ils ont eus autrefois, les differences du temps passé au present, les raisons qui les meuent à demander des libertez ou aduantages particuliers, & les raisons qui doiuent mouoir le Roy de leur refuser, mesmes les accoustumez, sās pourtāt que ceste disquisitiō sorte hors des termes de la paix, mais les cōsiderant comme le seul but desirable, arrēster les articles du traicté, lesquels resolu, le

Roy non comme chef de party, mais comme Roy; non comme tenant assiegees par ses lieutenans de petites bicoques reuoltees, qui encore apres vn long siege, ahannent à se rendre; mais comme dissipant par le clair soleil de sa presence les brouillars de la rebellion aux endroicts où ils paroissent plus espais, & d'une brusque & viue caualcade aduancé à la teste de son armee, atterrissant & torçant ceux qui s'osent trouuer en armes deuant luy, & font mine de luy vouloir faire teste à la faueur des lieux inaccessibles où ils sont logez; non comme demandant la paix, mais comme la commandant, les enuoiara publier parmy eux par personnes sages & fideles, de qualité eminenté & d'humeur douce, & qui sont recogneuës aymer plus le seruice du Roy & le bien general que le particulier. Apres quelque peu de temps qu'on leur donnera pour s'assembler & s'entendre, s'ils l'acceptent, leur faut tenir promesse, enuers tous vn Roy l'a doit tenir enuers ses subiects plus sainctement, puis qu'il a plus d'interest d'estre loué & honoré d'eux que de nuls autres.

S'ils la refusent, c'est lors qu'ils monstreront ouuertement leur mauuais courage; c'est lors aussi qu'il faut venir au dernier chastiment, mais chastiment digne de la Maiesté

d'un si grand Roy, & Roy d'un si grād Roy-
aume. Pour cet effect faut que le Roy s'y
porte tout entier, & qu'il y porte la fiance
toute entiere: Qu'à ce dessein il assemble en
diligence ses Estats dans le milieu de son
Royaume, à Bourges, Poictiers, ou Limo-
ges, là que luy-mesmes present, leur face
clairement entendre avec vn magnanime
courroux la rebellion qu'une partie de ses
subiects oppose à l'obeïssance qu'ils luy doi-
uent, avec vne paternelle plaincte; l'orgueil
qu'ils opposent au pardon & retour en gra-
ce qu'il leur offre, avec vn iuste ressentiment
la defiance qu'ils veulent mettre en balan-
ce, avec les promesses qu'il leur fait de resta-
blissement à tous leurs biens & droicts. Sur le
tout demandera aux Estats non plus con-
seil, qui ne se peut prendre sur la derniere
pertinacité de subiects reuoltez, que du
chastiment entier qu'il en faut prendre,
mais ayde & assistance pour y mettre la
main.

Il est certain que les Estats ne refuseront
iamais de se porter au nom de tout le royau-
me, à l'execution d'un desir que le Roy leur
fera voir si honorable & si iuste; que s'il ne
leur en faisoit l'ouuerture le premier, ils l'a-
feroient au Roy: si le Roy ne leur en deman-
doit les moyens pour l'executer, ils luy fai-
roient

roient tres-humble supplication de les recevoir d'eux. Ce qui sera par'eux resolu, & offert au Roy, sera quand & quand enuoyé dans les prouinces pour y estre publié, protesté, & iuré par tous en general, & chacun en particulier, & il est certain encores qu'il n'y aura prouince, corps, communauté, ville, ou congregation, qui d'un franc courage & d'une ialouse affectiō, n'accorde au Roy ce qui sera de son pouuoir pour vne telle oeuvre, & finalement il est certain qu'il n'y aura nul particulier qui n'y contribue son temps, son bien, son credit, ses armes, chacun en sa condition. Qui est ce qui refuseroit rien de tout cela pour vn subiect qui semble conuier tout loyal François à y donner sans regret sa propre vie? Qui est ce qui ruminât la fin pour laquelle les Huguenots refusent par extrême opiniastrété la paix que le Roy par extrême bonté leur offre, ne desseigne d'estre de la partie de leur faire sentir avec leur mal le regret de n'auoir accepté leur bien.

Mais faut alors que la main suyue la parole, que le Roy à la teste esbrâle son royaume d'un bout à l'autre, & le mene accabler & la rebellion, & les rebelles.

Que tous les canons, toutes les munitiōs, toutes les armes, tous les corps des combat-

tans de tout le Royaume entier choquent tout d'un temps ceste Hydre: Que le fer & le feu la portent par terre en sorte qu'elle ne s'en releue iamais: au contraire que la memoire en demeure mesmes ensepuelee dans la ruine de tous les lieux où elle a tenu teste.

Or à ce grand effort est il pas certain que les Huguenots auront bien auant le diable dans la fantaisie s'ils ne se recognoissent, & ne viennent à raison telle qu'on desirera d'eux? Il y faut proceder ainsi; l'honneur & la dignité & du Roy & du Royaume requerront cela. Vne grande vengeance doit estre hautement & dignement executee. Quand Dieu voulut perdre la terre par le deluge, il assembla les eaux au souffle des quatre vêts du Ciel, non par necessité, mais par maiesté: De mesme la paix refusee doit estre vengée & chastiee des effects du courroux de tous les François qui y ont tous interest. Et par ceste voye tout ainsi que le Roy sera caution enuers son royaume, que la guerre est tout à fait iuste, puis qu'il a fait tout ce qu'il a peu & deu pour luy donner la paix & ne l'a pourtant eue; ce qu'il veut que le Royaume sçache: De mesme le Royaume entier sera caution enuers son Roy de l'heureuse issue de la guerre, puis qu'il promet & proteste de lui fournir toutes ses forces pour

le seruir en vne si honorable entreprise, en laquelle Dieu qui est luy-mesme meslé en quelque sorte en la querelle, se mettra sans doubte de la partie, & fauorisera les iustes effects & du Roy & du Royaume, & les conduira à l'honneur & de tous deux & de luy-mesme à glorieuse fin.

Voilà le PETIT ADVIS d'un ferme Catholique, loyal François, humble subiect & fidele seruiteur du Roy.

le seint en vne si honorable compagnie, en
laquelle Dieu qui est luy-mesme a esté
quelque fois en la quelle, seigneur sans
doute de la part, seigneur seigneur
effice & du Roy & du Royaume, en la
condamnation à l'honneur de tous ceux & de
luy-mesme à gloire fin.

Voilà le Petit avis d'un seigneur
Catholique, loyal François, humble sub-
iect & fidèle serviteur du Roy.